

155

1375

НАУКОВА БІБЛІОТЕКА ОНУ імені І. І. МЕЧНИКОВА

Stabs
3

~~155~~

Gerichts-Ordnung
für
der Herrschaften

Erens und Witmundt



1598.

165
1375

h

Vir Linn Braff

vonn H E R R zu Distfrießland
vonn Kidtberg/ Herr zu Esens/ Stetes-
dorff vonn Witmund/ Füegen hiermit
allen vnd jeden vnsern vnterthanen/was
Standes/Würden oder Wesens die sind/
vonn mennglichen/ nehst erbietunge vn-
sers gnedigen vnd geneigten willens/ zu-
wissen. Nach dem wir/ von zeit an vn-
serer eingetretenen Regierung/nach dem
Fustapffen vnserer geliebten/ vnd löblichē/
in G D t t seligen Voreltern/ vns stetigs
zum hochsten angelegen sein lassen/
vonn embsiglich dahin befließen/ damit
wir in vnsern Landen/ Gebiet vnd Herr-
schafften/ jeder mennglichen/ Ein vonn
Auslendischen/ gleichmiesig durchgehen-
des Recht/ den Armen als den Reichen
ertheilen/ vonn die heilsame Justitien/
daran nehst Gott dem Allmechtigen/das
gemaine beste/vonn so wol der Landen als

A ij Leute

Leute wolhart hafftet/ so viel Mensch vnd
möglich/ fortsetzen möchten.

Vnd dan befinden/ ob wol da bevor/ vñ
vns vnd vnsern Gottseligen vorfahren /
wol bedachtlich verordnet worden/ wñ mas-
sen vnseren Vndersassen/ der Herrschaff-
ten Esens vñ Witmunde/ die Iustitia zum
schleunigsten Administriret, vñnd zu dem
ende auch/ was vor sachen vor vnsern
Ambtgerichten/ vnd gleichfalls an vnser
Kanzelen Ventiliret werden sollen/ Statui-
ret vñnd gesezet ist. Das doch dieselbe
wolgemeinte notwendige verordnunge/
in viel wege/ eingebrochen/ vñnd vorbey gegan-
gen vnd verandert worden/ dardurch dan
vnd wegen solcher vnordnunge erfolgen
kñnte/ das die sachen confundiret/ ober-
heufft/ vorweilet vnd verzogen werden /
vnd also vnser Vnterthane/ zu so schlei-
niger Rechtsverhelffunge/ als wir gern
sehen/ nicht gedeyen/ sondern mit grosser
cost

spieltunge vnd vñngelegenheit/ von den je-
nigen so Rechtens schewe tragē/ beschwer-
lich vñnd geleitet vnd vñnd getrieben wer-
den möchten. Solchen vnwesen nun
nach möglichkeit/ abzuhelffen vnd vor zu-
kommen/ So haben wir mit guten raffen
vorbedacht/ obangeregte vnser vnd vnse-
rer Christlichen löblichen vñnd vñnd
verfaste Ordnungge erneuert/ verbessert
vnd in nachfolgende Constitution vnd Ar-
ticuli gebracht.

I.

Was vor sachen an vnser Ambt
gericht gehören/ vñnd wie vor den-
selben Procediret werden soll.

Dennach setzen/ ordnen vnd wollen
wir/ das nun hinfuro/ gemaine schlechte
Schuldsachen/ allein vor vnsern drosten/ Ambt vnd
Gerichtschreibern/ vñnd denen so wir mehr darbey
ordne werden/ wie von alters herkommen ist/ in er-
ster

A. iij

ster

ster Instantie/ vorgetragen/ gehandelt vnd gericht-
tet/ vnd darmit vnser Cantzley/ worhin wir sonsten
andre sachen/ als hernacher bey dem Neunten Artis-
cul zufinden / verschoben haben/ ferner nicht be-
mühet werden sollen. Es wehre dann sach/ das
Schuldforderungge vorfielen/ so sonderlich streitig
oder zweiffelhafftig wehren/ vnd sich ober hundert
Thaler erstrecketen/ oder zwischen mehr Schulde-
nern/ der Praeferentie halben/ Disputation ent-
stände. In welchem fall/ sollen sie die Parthenen/
zu ordentlichen Proceß an vnser Cantzley verwei-
sen.

Vnd weil an vnsern Ambtgerichten/ biß anhe-
ro in gemeinen Schuldsachen Summarie Procediret
vnd verfahren worden/ vnd der Natürlichen billig-
keit/ auch den Rechten zuwider ist/ das in richtigen
bekantlichen Schuldforderungge/ weitleufftige Pro-
ceß solten geführet werden/ So lassen wir es nach-
mals darbey/ dz vor denselben vnsern Ambtgerich-
ten/ vmb gemeine Schuldforderungge/ Summarie de
simplici & plano, bevoorab/ da der Klegger auslendisch/
vnd in der Graffschafft Districßland nicht einge-
fessen ist/ procediret vnd verfahren/ dannoch darbey
vnser Vnterthane nicht verschnellet/ noch zur unge-
bür/ mit *executive* Processen/ vnd sonsten/ nicht
beschweret werden.

Von

II.

Von Citationen oder tagzeddu- len/ vnd deren execution.

Nad weil/ ohne vorgehende tagzeddul-
oder Citation/ Niemand gerichtet/ verdambt/
oder ihme das seinige aberkant werden soll/
vnd aber bishero/ bey vnsern Ambtgerichten/ etliche
mißbreuche vntergelauffen/ in deme/ das etwa die
ausgegangene Citations dem Citirten gar nicht/
zu weilen in dessen abwesen/ auch zu zeiten eben des
tages/ wann der Gerichtstag angeßalt ist/ *exequi-*
ret oder verkündet/ gleich wol die *execution* darauff
gezeichnet/ die *Citationes* also *reproduciret*, vñ gestracks
vff des Citirten nicht erscheinen/ Pfandunge erthei-
let worden sind/ dardurch dann nicht allein die vn-
schuldigen beschweret/ vnd vff vündtliche costen geia-
get/ sondern auch das Gericht vergeblich bemühet
wird.

So sollen forthin die jenigen/ welche an vnsern
Ambtgerichten tagzeddul oder Citations ausbrin-
gen/ dieselben also fort/ vñuerzogen/ dem Voget/ de-
me die verkündigunge zuthun gebüret / vberant-
wortent/ vñnd der Vogt solche gleichfals/ in *continen-*
ti also bald / oder / zum lengisten / nehistfolgen-
den Tag *exequiren* vñnd verkünden/ vñnd mit eige-
ner

ner Hand/ tag/ stund vnd plak/ auch wehme er sol-
chen tagzedul verkündet vnd *exequiret* habe/ vnter
oder off die Citation verzeichnen/ vnd solches durch
seine Frawe/ Kinder/ Gesinde oder andere/ nicht ver-
richten lassen/ dann da ein oder ander vnser Bogte
hiran nachlessig sein/ vnd die Parthen verabsau-
men/ oder in schaden führen würde/ Sollen sie mit
allein/ solches dem beschedigten/ aus dem ihren zu-
kehren vnd wandeln/ schuldig sein/ sondern darü-
ber vnser ernster straff vnd vngnade/ vnausbleiblich
gewartten.

Da aber der *Impetrant*, den tagzedul oder Ci-
tation/ vber ein ethmahl/ wissentlich/ hinder sich
hielte vnd erliegen ließe/ sol der Bogt dieselbe nicht
verkünden oder *exequiren* vnd ob er das schon thete/
solche *execution*, in Gerichte/ nicht geachtet/ dannoch
hirunder keine *collusion* oder gefehrde gebraucht
werden.

III.

Von des Beklagten vngehor- sam oder nicht erscheinen.

Wann dann die Citation im Gericht
reproduciret vnd kein mangel an der *execu-*
tion befunden/ der Citirte aber/ noch Je-
mand von seinem wegen nicht erscheinen würde/
vnd der Kleger in *continenti*, durch vorzeigung
Brieff-

Briefflicher vhrkunde/ seine Schuldtforderunge
richtig bescheinen könnte/ sol dasselbe/ nach bescheinem
ruffen in *contumaciam* zugelassen vñ angenommen/
auch darauff dem Citirten/ die Solution oder bezah-
lung bey straff fünf gũlden/ offerleget/ vñ anbefoh-
len/ vnd da er deme nicht nachkeme/ vff ferner an-
haltendes Klegers/ als dann gegen inen die Pfan-
dunge verhenget/ dazu die angesetzte straff von ihm
einbracht/ oder da er die abzutragen nicht vormöch-
te/ sonst umb seinen vngehorsam angesehen wer-
den.

Köndte aber der Kleger seine forderung ge-
satzter massen/ in *Continenti* mit *Liquidiren*/ soll vff
sein gebürlich ansuché/ er entweder in *Contumaciam*
zum beweiße zugelassen (worzu dannoch der Beclag-
te abermals zu Citiren) oder ihme *Mandatum de*
solvendo, cum *clausula*, bey straff dreier Gũlden/ er-
theilet werden.

Bliebe alsdann der Beclagte abermahls vn-
gehorsamlich aus/ vnd thete dem *Mandato*, weder
mit Bezalunge/ noch vorbringunge gnugsamer
vrsachen/ warumb er darzu nit gehalten/ keinen gnü-
gen/ Soll er vff des Klegers ferner anhalten/ mit
Pfandungen/ zur zalunge/ auch erlegung der peen/
angestrenget/ vnd hernacher mit seinen *defensionibus*
ehir nit gehöret werden/ er hab dann sonderlich
erhebliche verhinderung vorgebracht/ vnd dem
Kleger

Gleger seine vffgewandte Vncosten/ nach rechtlicher ermessunge/ abgetragen.

IV.

Von des Glegers aussen bleiben.

WEr es aber sach/ das der Gleger vff den bestimbten Rechtstag oder Termin/ selbst/ oder jemand von seinem wegen nicht erschiene/ vnd der beklagte dessen aussenbleiben/ im Gericht/ gebürlich beklagen würde/ sol die Citation gefallen sein/ vnd der Gleger hernacher nicht gehört werden/ er hab dann dem Beclagten die costen/ nach rechtlicher messigunge erstattet/ oder hette sonderliche ehe vnd noithaffte verhinderunge/ so ihnen zu recht entschuldigen könten/ vorzuwenden.

Wolte auch der Beclagte quittunge/ das er den Gleger befriediget hette/ oder sonsten beweis vorbringen/ warumb er deme nichts pflichtig sey/ vnd darauff Absolution bitten/ Sol ime das vorstattet/ vnd darauff erkant werden/ was recht ist/ vnd im fall er der Beclagte/ aus solchen/ in contumaciam gefüreten acten, schon der sachen verlustig wehre/ dannoch in die expensen nicht condemniret werden/ auch der Gleger/ da er hernacher sich einstellere/ die sach in dem Stande/ als er sie findt/ als sumiren vnd ausführen.

Wie?

V.

Wie mit den Pfanden vnd deren Sezung oder AEstimation verfahren werden sol.

WEs auch bey den Executionen der Gerichts bescheide vnd Urtheilen/ vnd bey den Pfandungen/ allerhand vnrichtigkeit ein zeitlang/ einbrechen wollen/ das bißweilen/ vnangesehen/ bey dem Beclagten sonsten andere bewegliche vnd Pfandbare Güter vorhanden/ die Creditorn in der Schuldener liegende Güter/ vnd deren abnützung/ so noch vff dem Lande hafften/ eingewiesen/ oder aber melckende Küe/ auch Pferde vnd Ochsen so zur Arbeit vnd in dem Pfluge gebraucht werden/ vnsern Vnterthanen abgepfandet worden/ Solches aber dieser vnserer Landschafften guten alten gebrauch/ vnd Rechten/ zuwider ist/ darzu in viel Wege vnsern Vnterthanen zu beschwerde geraicht.

So ordnen vnd setzen wir/ befehlen auch vnsern Bogeten vnd außkündigern/ bey den Aiden vnd Pflichten/ damit sie vns verwanth sind/ vnd vermeidunge vnserer vngnade ernstlich/ vnd wollen/ dz sie nit allein aigeninnigē vertagens oder pfandes/ so men vff vorgehende Rechtserkenntnis nit befohlen worden/

Bij

worden/

worden/ allerdings vñ genzlich sich enthalten/son-
dern auch bey anbefohleener pfandunge/ Niemand in
eines anderen liegende Gründe vnd Güter/ oder de-
ren nützung vnd fruchten/ so noch drauff sind/ nicht
einweisen/ so lang andere bewegliche oder fahrende
Güter/ die Schulde abzutragen genugsam/ vorhan-
den sind.

In gleichem/ vnsern Vnterthanen/ wo fern die
andere Pfandbare Güter haben/ ire Pferde/ damit
sie vns vnd diesen vnsern Landen dienen/ noch auch
ire Pflugochsen/ vnd melckende Kue/ darvon sie/ ihr
Weib vnd Kinder leben sollen/ keines wegs abpfan-
den/ sondern sich hierinnen den Landrechten/ vñ
der billigkeit gemess verhalten.

So sollen neben diesem/ hinfüfftig/ die zu ge-
wissene Pfände/ wann die ihr gewonliche zeit ausge-
standen/ durch gute verstendige Leute/ so von beyden
theilen darzu bewilligt/ oder im fall dieselbe sich de-
ren nit vergleichen könten/ von vnsern Beambten
hierzu verordnet vñ beaidiget werden sollen/ vff
billiche werth Estimiret vnd geschetzt/ vñ darnach
dem Gepfandeten/ von solcher Estimation der vier-
de Pfennig/ nach Landrecht/ abgezogen werden.

VI.

Von Einlegen vnd Arresten.

Wir.

Wir wollen auch/ daß hinfüro vnserer
Vnterthane/ so genugsam zurecht gefessen/
vñnd zu bezahlen haben/ vñnd kein Privat-
schuldts nicht eingelegt/ oder sie/ oder ihre Güter arre-
stiret/ sondern gegen dieselben/ nach rechtlicher Ord-
nung/ verfahren werden soll.

Wormit wir gleichwol vnserer Fiscalische/ vñnd
dergleichen Privilegirten forderung mit verstan-
den oder begriffen/ sondern vns darinnen vnser ge-
rechtigkeit/ vñnd wie es hierben/ in diesen vnsern
Herrschaften/ von Alters/ herkommen/ außdrücklich
vorbehalten haben wollen.

VII.

Wie es mit Vertrag vñnd Pfand-
geld gehalten werden soll.

Snd weil ein zeithero/ bey Vertrag vñnd
Pfandungsgeldt/ aller hand obermass sich er-
euget/ vñnd mercken lassen/ So sol fürbass Kei-
ner in gemeinen Schultsachen/ vor einen schlechten
Tag oder Pfandzeddul/ mehr nicht als ein Stubar
oder ein halb Schaf/ vñnd dem Boget zu verkunde
oder Vertrags vñnd Pfandgelt zween Stubar oder
ein Schaf/ zugeben schuldig sein. Vñnd ob einer
oder mehr hierüber thun vñnd geben würde/ das sol
ihme//

B ij

ihme//

ihme/ bey taxation der expensen, nit gut gethan werden/ noch der Schuldner und Beclagte zu restituiren oder erstatten nicht pflichtig noch gehalten sein.

VIII.

Von Appellation/ wie von unsern Ambtgerichten Appelliret / vnd solche Appellation anhengig gemacht sol werden.

In das aber unsere Vnterthane/ vmb so viel desto weniger/ sich einiger beschwerden zu beclagen/ sondern unpartheilicher Rechts erkantnus zuerfrewen haben mögen/ So soll einem jeden/ der sich durch ein Vrtheil an unsern Ambtgerichten ausgesprochen / beschwert zu sein vermainte/ frey stehen/ innerhalb zehen tagen/ nach gefelter sententia/ an vns oder unser Canzleyen zu appelliren/ vnd darauff seine beschwerde vnd sache/ gebürlich außzuführen.

Vnd ob wol/ nach anzeige vnd ausweisung gemeiner Rechten/ die Appellationes, so nit vff stehendem Fues/ von endvrtheilen/ eingewendet werden/ hernacher ex intervallo, als auch die Appellationen, so von Beyvrtheilen/ oder Interlocutorien, interponiret werden/ in Schrifften/ vor Notarien vnd Zeugen geschehen sollen.

Damit

Damit dannoch unsere Vnterthane/ etwa durch vnerfahrner Notarien vngeschickligkeit/ hierbey nit gefehret/ oder durch deren geitz vnd girigkeit nit beschweret werde/ So soll in irer wilkoer sein/ von allen vrtheilen oder bescheiden/ die sein definitivæ oder interlocutorig, in continenti oder ex intervallo, gleichwol als obstehet innerhalb zehen tagen/ vor unsern Beampten mündlich/ oder vor Notarien vnd Zeugen Schrifftlich/ zu appelliren/ Da anderst die sache/ ihrer art vnd beschaffenheit nach/ zu Recht appellabilis/ vnd ober zwanzig Gulden werth ist.

Wolte aber jemand coram Notario & testibus zu Appelliren erwhehlen/ soll sich derselbe alsdann in deme/ den gemeinen Rechten conformiren vnd gemess verhalten.

Unsere Beampte sollen auch solchen Appellationen stat geben/ mit der execution zu austrag der sachen/ einhalten/ vnd die Appellirende nit vntwillen/ oder sonsten deswegen nit beschweren/ In gleichen/ sollen unser Rheten dieselbe Appellation annehmen/ vnd darinnen verfahren als recht ist.

Jedoch/ daß solche Appellation/ da die nicht vor Gericht / in continenti oder ex intervallo vor unsern Beampten / mündlich / sondern in scriptis außserhalb Gerichtes / coram Notario & testibus, interponiret wehren / in gerurten zehnen

*statuto in
dibor posse
tetant
Myding
contiofert
66. cent. 3. ob
Jull. lib. 1.
obser. 36. n.
7. off. 130.
n. 4.*

zehen tagen an vnsern Ambtgericht intimiret, vnd nach ausgang ermelter zehen tagen/ innerhalb zwener Monaten/ an vnser Cankley gebürlich introduciret, Citatio vnd dergleichen notturfft gebete/ vnd mit reproducirunge derselben/ anhengig gemacht werde.

Dann im fall die Appellation/ vor ablauff der zehen tagen/ wie droben gesakt/ nicht interponiret, oder in bestimmbten zwenen Monaten/ angeregter massen nicht eingeführet würde/ Sol die allerdings erloschen/ krafftlois vnd delert sein/ vnd mit volnstreckunge der geselten Vrtheil verfahren werden.

IX.

Was vor Sachen an vnser Cankley gerechtfertigt sollen werden.

ES sollen an vnser Cankley nicht allein die Appellationen/ so ordentlich dahin devolviren, sondern auch alle andere sachen/ es sey omb Ehe/ Erbschafft/ Testament/ Vormündschafft/ Vnderen/ oder was gestalts die sein/ vnd bishero dahin gehörig gewesen/ nachmals anhengig gemacht/ vnd erorttert werden.

Vnd nach dem vnser Ritter schafft vnd Adel/ se vnd

se vnd allwege Privilegirt gewesen/ daß sie an vnsern Ambtheusern vnd Gerichten nicht/ sondern vor vns vnd vnser Cankley recht genommen/ So wollen wir/ das sie deme zu wider nicht molestiret, vnd omb keiner sache willen/ vnter was gesuchten schein es geschehe an vnsern Ambtheusern/ vor die Ambtgericht/ nicht gezogen/ noch anderstwohe als vor vns / oder vnsern Rheten/ an vnser Cankley wie glet hfalls die Pastorn/ Schull vnd Kirchendiener/ besprochen werden sollen.

X.

Welcher gestalt an vnser Cankley procediret werden sol.

ES sol aber an vnser Cankley/ in den sachen/ so dahin gehören vnd deuoluiert werden/ zuuorderst/ von vnsern Rheten zwischen den Parthenen/ die Gültigkeit vorgenommen/ vnd versucht werden/ ob die in der freundschaft könten verglichen vnd vertragen werden.

Wo fern dann die güte nicht zu langen wolte/ sol ihnen das Recht frey vnd offen sein/ vnd die Parthen zu ordentliche Proceß verstattet/ vñ angehalten werden/ das sie vermög geschriebener Recht/ vnd nachfolgender vnserer Ordnung/ in Schrif-

ten/

ten/

ten/ ^{or} fömblich vnd ordentlich handeln vnd Proce-
diren/ Es were dann die sache der wichtigkeit nicht/
oder sonsten richtig/ darzu befindlich/ das einer den
andern mutwillig ombtreiben/ vnd sich nicht wei-
sen lassen wolte/ vff welchen sal sollē unsere Rächte/
den Parthen zu verderben/ zu vnnotiger bemü-
hunge des Gerichts/ vnd ver hinderunge anderer
sachen/ keine weitleufftigkeit verstaten/ sondern de-
je uigen/ so Recht hat/ vnd sich zur billigkeit wil-
wissen lassen/ schleunigst Rechtens/ zur gebür/ ver-
helffen.

Dem nehst ordnen vnd wollen wir/ das zu
mehrer beforderüge vñ abhelffunge der sachen/ hin-
füro/ wann der Kleger sein Libellum oder Klage
(welche in allwege/ sie seye Summarisch oder Ar-
ticuliret, in Schrifften/ formlich/ vnd den rechten
Gemesß gestellt sein/ sonsten nicht angenommen wer-
den soll) eingibt/ er als baldt zu gleich/ mit gebüren-
den Worten/ den Krieg Rechtens befestigen/ oder
Litem contestiren, darauff dem Beclagten ein ge-
raumer Termin/ so dannoch nicht vber zwen Mo-
nat sich erstreckt (es werde dann aus rechtmessigen
ursachen anders ermessen) angesetzt werden sol.

Vnd sol der Beclagte alsdann/ in præfigirten
Termin/ gleichfalls Litem contestiren, vff die Klage
Categorie, durch die wort Glaube war/ oder nicht
war //

war/ ohne einigen anhang/ ebener massen Schrifte-
lich/ antworten/ vnd zugleich alle seine Exceptiones,
defensiones vnd einrede/ wie die sein/ vnd nahmen
haben mögen/ simul & semel, formlich vorbringen/
Sonsten hernacher darmit nicht gehört werden/ es
wehre dann/ das ihme die von neuem vor vnd zu
kemen/ oder es jme sonsten Rechtswegen zugelassen
wehre.

Hette er aber Exceptiones litis finitæ, als das
die sache vertragen/ verjahret/ oder ausgerichtet
sey/ oder dergleichen/ vnd andere exceptiones, litis
ingressum impediens vor zu bringen/ soll er nichts
destoweniger Eventualiter litem contestiren, vnd ant-
worte/ vnd unsere Rächte darauff erkennen/ ob solche
Exceptiones, vor der Kriegsbefestigung zugelassen/
oder nach derselben aus zustellen seyen/ Es wehren
dann dieselben/ vom Beclagten/ in continenti zu be-
weisen/ vff den fall er/ zu der Eventual litem contesta-
tion, nicht gehalten sein soll.

XI.

Vom Eid für gefehrdt zu Latein
Iuramentum calumniæ genant.

EWden nun/ nach beschehener
Kriegsbefestigung/ die Partheyen/ den
Eid

Ud vor gefehrde von einander begehren vnd fordes-
ren/soll solcher also fort darauff/ in alle wege geleit
set werden/ sonsten der Kleger/da er sich dessen ver-
weigerte/der sachen verlustig/der Beclagte aber/
da er denselben Ud mit schweren wolte/ geachtet
vnd gehalten sein/ als ob er der Glag gestendig weh-
re.

Da auch schon die Parthenen/ izt gemelten
Ud vor gefehrde/ bey vnd nach der Kriegsbesesti-
gung vorben gehen vnd nicht anfordern würden/
Nögen unsere Rächte/nichts destoweniger/wan sie
bedeuchte/ daß die Parthen ein ander boshafftig vñ
ungebürlich vmb zutreiben vnterstunden/denselben
Ud einen oder andern theil/ worbey die gefehrde
gespüret wird/deferiren vnd aufflegen.

XII.

Von Reconvention vnd Ge-
genclag.

Wann auch der Beclagte gegen den
Kleger hinwider zusprechen hette/ vnd sein
Reconvention, in fellen da die zu recht stadt
hat/ anzustellen vermainte/vnd die gegenclage/ der
Hauptsachen anhengig wehre/ darauffen flosse/ o-
der sonsten die betreffe/ soll er dieselbe vor / oder in
Conti

Continenti nach der Kriegsbesestigung vorbrin-
gen/ Vnd alsdan die Reconvention, zugleich vnd
neben der Hauptclage/Simultaneo processu, gefüret
vnd geendiget werden.

Sonsten/da er hiran seumig/ vnd die gegenclag
hernacher/ doch vor beschlus der sachen/ einwenden
würde/ sol die gegenclag/ im fall sie sonsten erheb-
lich vnd zuleffig ist/ von der Hauptclag absonder-
lich/ vnd vor sich selbst allein erortert/ vnd der
Hauptsachen decision hierumb nicht ausgestellt
werden.

XIII.

Wie fürter / nach der Kriegsbe-
festigung / Procediret soll wer-
den.

S Nun der Krieg Rechtens/mit clag
vnd antwort/ vorgesakter massen verfast/
Wolte dann der Kleger/ vff des Beclagten
exceptiones repliciren, vnd folgends Beclagter du-
pliciren/ soll ihnen solches frey stehen/ vnd darzu
gebürliche Termine gegünnet/ sonsten aber fer-
ner wechselschriften/ vor gefüreten Beweis/ nicht
verstattet werden/ Sondern beyde theile/ ihre be-
weis-

weisarticuln/ doch der klage/ vnd Respectivè den de-
fensionen gemess/ vnd daraus gezogen/ (wo fern
sie zuuorn dieselben nicht Articuli ret eingeben het-
ten) vnd folgendes ihre Interrogatoria, alles formb-
lich/ vnd ohne oberflus/ einbringen/ vnd soll darauff
mit dem beweis/ nach Ordnung der Rechten ver-
fahren werden/ vnd in vnser Rechten macht stehen /
die Zeugen entweder selbst zu beaidigen vnd exami-
niren/ oder aber hierzu andere/ von vnserntwegen /
zu Committiren.

Nach volnsfürter vnd publicirter attestacion
aber/ sol keinem theil mehr/ als zwo Schrifften/ ein-
zubringen/ auch ferner lebendige Kundschafft zusüh-
ren/ nicht verstattet/ sondern beyderseits zuschlies-
sen angehalten/ vnd ihnen darzu sein geraumer
Termin angesakt/ oder wo fern sie deme in bestimb-
ter zeit nicht nachkemen/ die sache/ es würde dann
mit Rechts erkentnis/ nach gelegenheit/ ein an-
ders ermessen/ vor beschlossen/ Ambswegen ange-
nommen/ vnd fürderlich darauff erkant werde/ was
Recht ist.

XIV.

Das keine Verzüglichkeit in den
Processen gestattet werden sol.

Vnd

Nid vff dz der Arme Man/ durch des
Reichen gefährliche ausflucht/ nicht abgemat-
tet/ noch sonst die Proceß in infinitum nicht
verzogen/ verirret oder verwirret werden/ Sollen
vnser Rächte ein fleissiges Auge darauff haben/ vñ
darüber halten/ damit alle verzeuglich ausflucht
vnd weitleufftigkeit/ auch vnnötige dilaciones vnd
prorogationes, abgeschnitten vnd vermittè werden /
vnd zu dem ende/ da ein oder ander theil/ gefehrli-
che verlengerunge vnd vffschub der sachen suchte/
dann noch vorgebè wolte/ als geschehe solches erhai-
schender seiner sachen notturfft/ Sollen sie demsel-
ben/ so oft es inè nötig zu sein bedüncket/ ob es gleich
ex aduerso nicht gesucht würde/ Ambswegen lura-
mentum malitiæ aufflegen/ vnd im fall der sich den-
selben Vnd zuleisten waigerte/ die gesuchte dilation
oder verzug keines wegs gestatten.

Vnd nach dem die gemeine Recht verordnen
vnd wollen/ daß ein jeder Civil Sache / innerhalb
dreier Jahren geendiget werden soll/ So wollen
wir/ dz vnser Rächte hierüber staiff halten/ das alle
sachen so künfftig an vnser Sankley eingeführet
werden/ oder innerhalb Jahres frist eingeführet
sind / zum lengisten in dreien Jahren ir endschafft
erreichen/ vnd da die Partheyen hinein seumig weh-
ren/

ren/ vnd die sache drüber verschlüssen vnd so weit
stecken liessen/ soll nach vmbgang bestimpter zeit/
vorbehaltenlich den Parten die Acta probatoria, nach
Recht zugebrauchen/die Instantia gefallen/ vnd tod/
auch vnser Rächte nicht gemechtigt sein/hernacher/
ob schon beide theile gerne wolten/ vff die ergangne
vnd verlegne Acten zusprechen vnd vrtheilen/es
wehre dann aus rechtmessigen Brsachen/ vnd vff
vorgehende erkänntnis/ ein oder ander theil/ aduer-
sus lapsum ~~restituere~~, restituiret.

Die Sachen aber/ so albereit vber drey Jahren/
vor Publication dieser vnserer Ordnung/ an vn-
ser Kanzley gehangen/ vnd entweder die Parthenen
dieselbige haben erliegen lassen/ oder aber sonst
durch eingefallene verhinderunge die pronunciation
oder ausspruch bishero verblieben/ vnd aus gestellet
wehren/ wo fern anderst die Parthen innerhalb Ja-
resfrist/ von dato an/ vmb dero erledigung vnd
entscheide/ bey vnsern Rächten gebürlich anhalten
werden/ sollen hir mit nicht gemeinet oder gefallen
sein/ sondern von vnsern Rächten/ in Jahres frist/
vff behörlich ansuchen/ schleunigst abgeholfen vnd
expediret werden. Aber nach vmbgang des Jahres/
vnd da in mittelst die Parthen nachmals seumig
verbliebe/ lassen wir es bey voriger vnserer/ vnd ge-
meiner Rechten Ordnung bewenden.

Von

XV.

Von verfassung der Br- theil.

Wann nun in der sachen/ vorgesagter
massen/ordentlich Procediret vnd beschlossen
ist/ sollen vnser Rächte die acten mit getrew-
en fleiß/ ohne einige affection, ersehen vnd erwegen/
sich eines rechtmessigen vrthails vergleichen/ vnd
dieselbe gebürlich/ den Parthenen/ vff vorgehende
Citation/ eröffnen/ vnd hierbey zuuörderst Gott dem
Allmechtigen vnd die hailige Justitien, dem nehisten
vnser vbligh Landrecht/ gute gebreuche/ auch die ge-
meine beschriebene recht/ in der furchte des Allme-
chtigen/ vor Augen stellen/ vnd sich dermassen be-
zaigen/ als sie es vor dem gestrengen Richter stuel
GHRZETZ/ vor vns/ vnd meniglich/ zu den eh-
ren verantwortten können/ vnd ihr habende bestal-
lung vnd Ahdspflichte ferner ausweisen.

Würden sie aber die sache demassen intricat
vnd zweiffelhafftig finden/ das sie sich einer mai-
nung darüber nicht vergleichen könnten/ sollen sie
vff der Parthenen (da die es abzutragen vermöch-
ten) oder sonst vff vnsern kosten/ die acten an vn-
parthenische Rechts gelarten/ verschlossen zuschi-
cken/

ten/ vnd sich bey denen Rathhs zuerholen/ bemehtiget sein/ vnd darauff die Sententie formiren vnd aussprechen. Im fall auch/ ein oder ander theil begehren würde/ daß die Acten ikt geregter massen verschickt werden möchten/ soll ihnen darinnen / vff des begehrenden kosten/ gewilfahret/ vnd verfahren werden/ wie vor stehet.

XVI.

Ob/ vnd wie / von Urtheilen an vnser Cansley ergangen/ sich jemand beruffen möge.

Wiewol wir vnser Cansley mit gnußsam qualificirten Personen/ dermassen bestellt vnd versehen haben/ auch künfftig besetzen vnd versorgen werden/ das menniglichen / vnser verhoffens/ gleichmessig Recht/ von vnsern Rächten widerfahren/ vnd Niemand sich einiger beschwerunge zubeklagen haben wird/ vnser Unterthane es auch/ jeder zeit/ gut vnd freywillig/ bey deren ausspruch beruen haben lassen.

Nichts destoweniger/ damit sich ober vns / vnd die vnserige/ Niemand als solten wir ihme nicht gebürlich Rechtens verhelffen/ mit sügen zu beschwe-

beschweren habe/ Würde dann jemand vermeinen/ das ihme an vnser Cansley/ durch gesprochen Urteil/ ein beschwerde zugefüget sey/ soll ihme gleichfals frey stehen/ von solcher Sententie, innerhalb zehen tagen/ von zeit an gefelter Urtheil (da anderst die sache zu recht appellabilis ist) in allermais droben bey den Ambtgerichten gesetzt/ sich vor vns/ vnd sonsten Niemand zuberuffen vnd appelliren/ Welcher Appellation auch vnser Rächte deferriren sollen/ Jedoch daß der Appellant zusehenderst schwere/ das er von solchen Urtheil nicht gefehrlich oder zuuerlengerunge des Rechten Appellirt/ sondern nicht anderst wisse vnd verstehe/ dan er hab ein gerechte sache / vnd sey ihme/ seine Gerechtigkeit zu beschirmen/ Appellirens vnd besser Recht zuseuchen moit / Daß er auch/ da er der Appellation nider sellig/ oder die nicht prosequiren würde/ dem Appellaten alle kosten/ schaden/ hindernis vnd Interesse, so ihme mit recht erkant wehren / oder werden möchten/ abtragen vnd gnuß thun wolle.

Da nun der Appellant sein Appellation gebürlich interponiret, ist vorgesagten *formaliu* Andt geleistet / vnd innerhalb zweyen Monaten / wie obgesetzt / die Appellation vor vns anhengig gemacht / vnd introduciret D ij hette.

hette. Damit hierbey vnser Landvätterliche wol-
meinunge nit mißbrauchet/ vnd gefehrlicher verzug
der execution, zu Elusion der Justitien/nachtheil vñ
vmbtreiben des obsiegenden thails/ vñnd zur vngel-
uhr/ mit eingereumet werde. So sollen die Par-
then ihre gravamina vnd notturfft/ jeder in zwenen
Producten vns vorbringen / vnd darmit/es wehre
dann/ das wir gestalten sachen nach/ mehr Schriff-
ten zulieffen/ zum vrtheil schliessen.

Vorauß wir nach erfehunge der Parthenen
vorbringens/ vnd eingennommener vnserer Rächte
vorigen Motiven vñnd Relation, auch gnugsamer
erwegunge der vmbstende/nach gelegenheit der sa-
chen/ da wir es nötig befinden/ die acten verschlos-
sen/ an vnparthenische Rechtsgelarten schicken/ de-
ro rechtsbelernunge/vñ vnsern kostē/da es die Par-
theyernicht wol vermochten/ oder beschwerde het-
ten/ einziehen/ vernehmen/ vnd folgendß erkennen
wollen was recht vnd billich ist.

Darben es auch ohne einiges ferner Appelliren/
oder dergleiche (in massen ~~beheft~~ solches/ ober aller
Menschen geduckten/ andieser vnsern Herrschaff-
ten/ mit vnserer Vnterthanen guten wissen/ freyen
willen vnd belieben herkommen ist) endlich bleiben/
vñnd ein jeder sich fernern vñndordentlichen beruffens/
vñnd

vñnd vnser Vntersassen an frembde ausländische
Gerichte zuziehen/ bey vermeidunge vnserer vñgne-
digen straff enthalten soll.

XVII.

Von Procuratorn vñnd dere Be- soldunge.

Darmit dann endlich auch der Pro-
cess an vnser Cantzley dieser vnser Ordnun-
ge vñnd den rechten gemess̄ geführet vñnd ge-
trieben werden möge/ vñnd die Partheien sich selbst
mit irrigen Recessen vñnd einlagen nicht vñffhal-
ten/ vñnd vnser Rächte vñnnötig fatigiren dörf-
fen / So sollen drey beaidigte Procuratores/
so verstendige auffrichtige Menner sein vñnd der
Parthenen (welche ihrer begehren) notturfft ge-
bürllich vortragen/ die Terminos respiciren, vñnd
was sich der Ordnunge nach eignet/ leisten/ an vn-
ser Cantzley bestellet vñnd angeordnet/ Aber kein
andere/ ein oder ausgefessene rabulæ vñnd zancf-
cher/nit zugelassen werden.

Gleichwol einem jeden/ der da wil/frey bleiben/
seine eigne notturfft selbst gebürllich vorzutragen/
vñnd nach seiner gelegenheit/ seines gefallens/ Ad-
vocaten zugebrauchen / Jedoch das dieser vnserer

D iij

Ordnun-

Ordnunge gemess gefahren / vnd vnsern Vnter-
thanen / dadurch zu vnnötiger weitleufftigkeit vnd
cost spieltunge / kein anlauff gegeben oder beschwer-
de angefügert werde.

Die Procuratorn aber sollen zu allen thei-
len im ersten / oder zum lengsten im zweitem Ter-
min / ihre gnugsame volmacht / im Gericht vorbrin-
gen / vnd dieser vnserer Ordnung / vnd ge-
meinen Rechten allerdings vnsträfflich nachkom-
men / Sonsten da sie deme zu wider theten / sol-
len sie / so oft solches von ihnen geschicht / mit straff ei-
nes Guldens / welche zum Behuff der Armen ver-
wendet werden soll / aus dem ihren / ohn der Par-
then zulage oder erstattung / abzutragen / belegen /
oder nach gestalt ihres beharlichen ungehorsam-
es / saumsales / nachlessigkeit vnd verwürck-
unge / mit schwerer arbitral straff angesehen / dar-
zu / ob sie den Partheien / in ihren sachen etwas ver-
absauneten / solchen schaden / aus dem ihren / zu-
wandeln / ernstlich angehalten werden.

So sollen die Procuratorn / auch den armen
Partheien / wann ihnen das gebürlicher weis off-
erlegt wird / vmb sonst vnd getrewlich dienen /
die andern aber ~~mit~~ ^{nicht} vbernehmen / vnd vor einen
Haupt-

HauptRecess mehr nicht als drey Schaff oder *15 die 5*
sechs Stubar / vor einen schlechten gemeinen vor-
trag / zwey Schaff / fordern oder nehmen / vnd *f. 10 die 3*
sich vnnötigen Reccessirens enthalten / noch sich
dieselben / oder etwas weiters zehlen vnd beloh-
nen lassen / Da auch ihrer besoldunge halben
zwischen ihnen vnd den Partheien streit vorseh-
le / solches zu vnserer Kähte erkänntnis setzen / vnd
sich daran genügen lassen. *Adde vor auffornung der Vn-
ter für jay gleich interlocutoria od definitio 26. ff*

Vnd sollen vnser Kähte darauff sehen /
das vnser Vnterthane / von den Procuratorn hi-
rüber nicht beschweret werden / vnd da sie dessen
etwas im geringsten vernehmen / den eussersten
ernst dargegen vnser entwegen einwenden.

XVIII.

Von Protocolen vnd Copen-
engeldt.

Nach dem sich dan Rechtswege billich
gebüret / vñ vor diesem / in vnsern Herrschaff-
ten /

ten/von vns vñ vnsern Gottseligen Vorfahren ver-
ordnet/auch bis her/ gehalten ist/ daß der Parthen-
en vorbringen ordentlich zu Protocoll gebracht vnd
verzeichnet worden/ So wollen wir/ das nach-
mals nicht weniger/ so wol an vnser Kanzley/ als
Ambtgerichten/ alle vnd jede Producten vnd acten,
ordentlich vnd wol Protocolliret vnd verwahrt/
auch Niemand/ ohne erkentnus Rechtens vnd vr-
laub vnserer Rächte oder Beambten/ respectiue,
kein Copen vnd Abschrift gefolget werde/ darzu
vnser Vnterthane/ da men aus dem Protocoll oder
sonsten abschrift ertheilet werden/ mit vbermessi-
gen vnzüemlichen Copengeld nicht vbernommen
vnd beschweret/ vnd von der eingelegten Producten
oder eroffneten attestationen Copie/ von einem vol-
geschriebenen Bogen/ so vff jeder seiten vier vnd
zwanzig zeilen oder linien volnkömmentlich haben
sol/ mehr nicht als fünff Eifert gefordert oder ge-
nommen werde.

In massen wir von diesem albereits vnsern Se-
cretarien/auch Ambt/gerichts vnd Kanzleyschrei-
bern/ in ihren bestellungen/ eingebunden haben/
vnd nachmals hirmit bei ihren Aiden vnd Pflichten
einbinden/ auch vnsern Rechten vnd Beambten
ernstlich befehlen/ da sie einen oder mehr befinden/
so deme zu wider thete/ das sie den oder dieselbe/ mit
allen

allem enffer/ ansehen/ vnd solche vngedühr keines
wegs gestatten/ auch nach gestalten sachen solches/
vmb mehres ernstes vnd einsehens willen/ an vns
gelangen lassen.

XIX.

Von straff der iemigen/so sich un-
gebürlich vor Gericht verhal-
ten.

De deme/ soll sich ein ieder/ so wol die
Procuratorn als Principalen/ im Gericht/ al-
ler schmah vnd schimpffreden/ nicht allein je-
gen dem Richter/ sondern auch vntereinander/ dar-
zu vnmötiger weitleufftigkeit/ vnzüemliche geschrey-
es/ ruffens vnd anderer vngedühr gentslich eussern
vnd enthalten/ sondern die notturfft/ mit gebürli-
chen worten/ glimpfflich vnd bescheidenlich/ vor-
tragen/ vnd aller zucht vnd Erbarkeit beflissen.
Würde aber einer oder ander hierwider handeln/
soll der oder die/ mit zween Goldgülden vnmachles-
sig/ auch da solches gegen vnser Rächte/ drosten
vnd Beambte freuentlich geschehe/ oder sonsten/
nach gestalt der verbrechen in andere wege härter
vnd arbitrarie gestrafft werden.

Von

Von straff der ienigen / so ohne
redliche vrsache Litigiren oder
Appelliren.

Beschließlich / weil zu mehrmahlen et-
liche vnrühige vnd zanklüstige ohne recht-
messige vrsachen / mutwilliger weise andere
Leut / in vnnötige Rechtsfertigung / vergebliche
vnkosten vnd weitleufftigkeit führen / so wol ihnen
selbsten als andern zum verderben / So sollen die
ienigen welche dergestalt mutwillig / andere ohne
einige redliche vnd erhebliche vrsachen in Rechtsfer-
tigung bringen vnd vmbtreiben / vnd der sachen
niderfellig vnd verlustig werden / hinfüro nicht
allein dem widerthail alle kosten vnd schaden ab-
tragen / sondern nach gelegenheit / vnd gestalt der
Person / sachen / vnd verbrechunge / vns in ein ar-
bitral Geldstraff / zum wenigsten vff zehen Gold-
gülden condemniret , oder im fall sie die Geldstraff
abzutragen nicht vermöchten / mit einer willkürli-
chen oder arbitrari straff vnnachlässig vnd endlich
angesehen werden.

Wie es im Broichen vnd der-
gleichen sachen gehalten werden
soll.

Beslich / als die Broiche sachen / te vnd
Ballwege / in vnsern Herrschafften / ihre be-
sondere gemessene ausrichtung gehabt / soll
es nachmals darbey bleiben. Vnd damit sich
auch hirunder Niemand's einiger beschwerde zube-
klagen habe / wollen wir jemand's von vnsern Rhe-
ten darzu committiren / vnd befehligen / so jederzeit
vnd zum wenigsten alle Monat / in beysem / vnd ne-
ben vnsern Beambten / die broiche / vff vorgehende
beyder theilen Citation / angehörte klag antwort /
bericht vnd gegenbericht / auch gefürten bewais /
gleichwol ohne Solennen weitleufftigen Proceß / dem
Landrechte / herkommen / vnd billigkeit nach / aus-
richte / Wollen auch darbey gebürlich einsehen ha-
ben vnd thun lassen / das hirin die gleichheit aller-
dings gehalten / vnd Niemand beschweret wer-
de.

Von Handhabunge vnd vollen-
ziehung dieser Ordnung.

Damit nun obgesakte vnser Verord-
nung vnd Articuli/ alle vnd jede/ eigentlich
vnd vnerbrochen gehalten werden/ deme-
nach befehlen wir vnsern Rheten/ Drosten/ Secre-
tarien/ Ampt/ Gericht/ vnd Canklenschreibern/
Bogeten/ Auskündigern/ vnd in gemein allen vnd
jeden vnsern Vnterthanen/ das sie sich/ sambt vnd
sonders/ diesser vnser Verordnunge gemess verhal-
ten/ vnd dieselbe alles ihres einhaltes gehor-
samlich vollziehen/ Vnd sollen sonderlich vnser
Rächte schuldig sein/ hierüber steht vnd festiglich zu-
halten/ damit deren so wol durch sie selbst/ vnd ande-
re vnserer Beampte/ als die Parthenen/ Bogete
Auskündiger/ Procuratorn/ vnd andere Gerichts-
verwante Personen/ stracks vnd vnweigerlich nach-
gegangen werde/ Vnd ob sie in deme/ bey einem
oder andern/ auff ihr einsehen vnd vntersagen kein
gebürliche folg vnd gehör nicht haben könt-
ten/ Sollen sie solches an vns/ fürdersam vnd
vmbstendiglich gelangen lassen/ worauff wir
vns gegen die vngheorsame mit behörenden ernst vñ
straffe/ dermassen werden zu bezeigen wissen/ damit
menniglich spüren möge/ vns sey die heilige Iustitie
vnd vnserer Vntersassen wolffart enfferig angelege/
vnd ein Ernst/ das diese vnser Ordnunge ohne zur-
rütunge vnd einbruch steiff vnd richtig gehalten/
geschützt vnd gehandhabt werde.

Jedoch

Jedoch wollen wir/ das in denen fellen/ so hies
rinnen nit ans gedruckt stehen/ neben den gemeinen
beschriebenen/ vnd vnsern vbliehen Landrechten/ die
bisher in diesen vnsern Herrschafften herbrachte
vnd abgeschaffte gebreuche/ in acht genommen vnd
gefolget werden/ vnd vns darbey vorbehalten ha-
ben/ diese vnser Ordnunge/ zu jederzeit/ nach gele-
genheit zu verbessern/ zunehmen/ mindern vnd ver-
ändern.

Vnd sol diese vnser Ordnunge/ damit sich de-
ren inhalts menniglich zu berichten vnd Niemandes
der vntwissenheit zu behelffen habe/ an vnser Cank-
len vnd gewonlichen Amptgerichts stellen öffent-
lich angeschlagen/ vnd in allen Larpeln von dem
Predigstuel abgelesen werden. Geben vnter vn-
serm Secret vnd Handzeichen vff vnserm Hausz
Esens am zwoiten Monatstag Aprilis Nach
Christi vnser Herrn vñ Seligmachers
Geburt im Funffzehen hundertem
Acht vnd Neunkigsten
Jahr.



28. 378.

H. 183479

[Handwritten signature or scribble]

НАУКОВА БІБЛІОТЕКА ОНУ імені І. І. МЕЧНИКОВА

НАУКОВА БІБЛІОТЕКА ОНУ імені І. І. МЕЧНИКОВА

НАУКОВА БІБЛІОТЕКА ОНУ імені І. І. МЕЧНИКОВА